

楊百朋建安人進士萬曆二十四年在合浦令
蒞政寬大革絕火耗嚴禁佐領差人下鄉待
士恩禮兼至有以文藝見者委曲開迪詳加
評品諄諄不厭至左右胥吏毫不假詞色時
值內官開採供應浩煩百務芟集賴公多方
調停故事集而民不病尋陞南部士民德之
陸元錫仁和人進士萬曆二十九年知合浦完
稅不聞鞭朴創釐文清署以造士翩翩儒令
也

劉行義號伊人漳浦人進士萬曆二十九年知
合浦豈弟廉介精明詳審憫里甲凋敝諸事
力爲節省一絲一粒不妄取于民折兩造以
片言擬罪不屬曹吏追徵不擾而民輸恐後
歲無逋負尤加意士人課藝不倦修學宮建
浮屠以培文運時瓊黎叛檄狼兵征之所過
擾民公具犒出二十里親止之令從間道行
身當狼兵之囂凌不顧也其愛民如此覲行
召入天部

陳良言江西人由舉人天啓三年令合浦賑民
課士衆稱慈母

徐棟南直寧國人以歲貢知靈山縣事廉介自
持公平蒞政秤收親自兌封里甲悉行蠲省
前尹催徵苛刻民多逃竄公招集復業至吏
書弄文長單保家侵漁者悉按以法暇日
諸生講究經義季課細加評品士益知向學
後以直道難容士民至今思之

郭湍福建莆田人由舉人授靈山教諭長於文

學克端師範勤課業以作文明禮教以正俗
受聘典文衡陞太平府通判

蔣蒙瓊山人由選貢除靈山訓導持身正直賦
性冲淡蔬食布衣晏如也教士以行誼爲先
士有貧不能婚葬者捐俸以助建文會所市
高塘田租二百餘石以給其費後遷建陽教
諭士子就文會所立公牌位春秋致祭焉

焦瑞南京旗手衛人萬曆六年以恩貢知靈山
縣事操行廉潔催徵輕平民咸德之且文學

焯著加意育才月課諸生必捐餼廩以供

蕭學儀廬陵人舉人萬曆四十五年知靈山縣
事清白自矢喜怒不形而遇事據理裁斷紛
疑立剖吏胥惴惴奉法惟謹而已條陳利弊
一十二款豪猾斂迹士民德之覲行立石以
垂不朽

汪游龍號時庵直隸懷寧人辛未進士崇禎五
年令靈山詢民瘼知苦西賊自募壯士五十
名犒勵操演撥欽州健兵八十以防城守建

營房製火器人思用命乃擒大盜十餘斬賊
首級懸於圖丫山督兵追至博白界殺賊二
十餘級生擒五名賊鋒大挫又追賊於雙橋
等處斬獲十九名境內安枕捐資葺城修橋
凡簿書親自檢點司錢穀者皆不得窺以爲
奸吏畏民懷選房稿刻窓藝作講章勤季考
捐貲五十兩治學宮民甚頌之以調煩去攀
轅立石

補遺

孫曇瓘吳郡人曉暢兵法而運矛超距冠絕一時元徽五年以屯騎校尉遷越州刺史俾選越騎人衛吏民素聞曇瓘將畧莫不聽命尋進輔國將軍時蕭道成謀逆司徒袁粲欲討之乃徵曇瓘帥越騎至建康粲敗瓘獨脫走歸吳逾明年道成捕殺之南宋史

熊琦南昌人由進士嘉靖末任廉州知府廉平剛正不避權勢時有海寇登岸掠民公身先冒矢石勢逼寇舟寇銃如雨皆不能犯寇神

之膽喪心寒乘潮遁去會採珠守城悉老弱
有山寇越城劫去庫金公寧坐不職不欲擾
民其功德庇廉者大矣

主如瓚號星岡泰和人嘉靖末由鄉薦以虞部
郎出守廉州甫三月以禮致仕廉民稱其剛
直有疏裁中使之風勤勵有勸課農桑之志
有守有爲類秉鑑之稱最克公克平比大賓
之爲良公去民不忍舍乞靴立亭未果乃立
碑以紀之

王兆魁泰和人由恩貢歷監授合浦丞蒞任五載淡泊自如且文學優長政治簡靜奉委清丈田畝自携日食公平正直人皆悅服陞任去日匹馬肩囊隨身而已廉介如此士民至今羨慕不已

劉汝翺江西萬安人由舉人萬曆五年知欽州襟懷仁厚政有大體寓撫字於催科雖雞豚菽帛亦允輸賦四民便之時行清文豪猾不得兼併吏書不敢那移州之耆稚咸就之如

慈父母秩滿行日舉州遮畱弗得送至靈山
誌遺愛於天涯亭焉

薛孟雷福建福清人由進士萬曆十二年任兵
巡道軫恤民隱敦重耆碩作興士類沿海議
設塾臺派軍防守郡北空曠設營障蔽民賴
以安

胡鰲沅陵人嘉靖甲辰以進士知廉州時採珠
之後郡邑凋敝災旱相仍鰲咨求民瘼下寬
卹之令躬自賑濟多所存活逾年復詔採珠